

Wos de Baue net kennt...

Dös wae scho ümme su, dös in Kinnenà wuu annesch besse schmeggt wii dehemm, àà wenn's Vatte un Mutte net hou wölln un schimpfn. Wii iich glää wae, hamme mittn im Durf in de Schmiddn gewaat. Bai uns uuem konnt's ze àssn gegàbb wos gewöllt hot, dös wae ümme inträssante, wos untn aufn Tiisch kummà is. Un dou bin iich rümgschlichn, wii dii Katz um häasn Brai un hou me wos gfochtn.

Ooms, wenn mai Vatte noch net van saine Schuumachewàrgschtött dou wae, hot mai Mutte öftesch à Ààch zgedrüggt, un scho wae iich de Tröppm untn un ze Schtummstüue drinnà. Dou hou iich nouchet äescht àmool gschtannà.

"Wos willstn duu scho widde? - 'S gibbt negs! Ab! - Odde hostà dai Kostgàld debai?" Su hot miich de Schmiid scho ümme empfangà. Un su schnell wii iich drinnà wae, wae iich àà widde drausn, mit ääne schön Wuut im Bauch. Oue baim Abuuetstüüelà is mesch ümme kummà, dös iich àà main Kuuepf hou un net su schnell nouchgàbb. Un iich bin widde nai de Schtumm un mit ääne Tuuetesveachtung am Schmiid vebai. Un dann is dii Tantà Else à Schtügglà auf de Bengg gerutscht, un dii Linda hot me wos auf main Tàlle gààm.

Oue äämool bin iich schöö aigangà. Wos wae denn dös? Àrpfl un à waisà Suues mit Hàring un Gargn- un Öpflschtügglà un Zwiiwl? Dou hot dii Tantà Else gsocht: "Dös senn aimaniietà Hàring!" Oue deswààche hot mesch àà net gschmeggt. Un iich bin auf main Platz rümgerutscht un hou miich gschààmt.

Dou hou iich auf äämool àn göttlichn Ainfall ghout. "Iich muss àmool aufn Gloo!" hou iich schnell gsocht, un scho wae iich drausn. Un su schnell wae iich noch kemoll uuem un in main Bett.

Am annen Touch oue, dou hamm dii Schmiids oue üüwe mai Manööwe gelacht, äescht ràcht de Walte. Un dàà hot gsocht:

"Jà, wos de Baue net kennt, dös frisst net!"

Anneliese Frank-Hübner